



Despues di basta rumor y hasta declaracion algun dia atras di e mesun partido, bisando cu e noticia no tabata berdad, finalmente ayera partido Raiz a confirma e salida di minister Geoffrey Wever for di partido Raiz.

Mediante un comunicado publica riba rednan social, e partido a anuncia salida di

minister Wever: "Plataforma Raiz ta desea di informa su miembronan, simpatisantenan y publico en general cu miembro di partido, Geoffrey Wever a tuma e decision pa retira di e plataforma. Geoffrey Wever ta un profesional y tabata un miembro importante di nos ekipo, trahando incansablemente riba nos vision comparti den areanan di economia, desar-

Geoffrey Wever ta retira di partido Raiz

oyo sostenibel y agricultura innovativo. Su decision ta uno propio y a wordo tuma a base di un bista diferente di con e como persona ta desea di sigui traha ariba, pa nos pais, y con politica mester wordo hiba. Raiz ta un Plataforma cu por wordo mira como un incubator unda cu ta fomenta ideanan nobo, innovacion, y desaroyo personal y profesional. Raiz su portanan ta habri pa profesionalnan cu tin vision y gana di cambia nos pais pa miho. Miembronan lo bin y miembronan lo bay haciendo nos plataforma cada bes mas fuerte. Durante RAIZ su periodo den gobernacion, nos a muestra a base di ehempel con Gobierno por traha a base di cooperacion y colaboracion, sin distincion di colornan politico. Ningun hende ta indispensable y semper mester tin espacio na tur esnan cu kier yuda genera cambio y promove ideanan nobo, sea cu nan ta simpatisante di Raiz of no."

Ademas, e partido ta sigura cu nan vision pa politica na Aruba ta pa progreso y cambio sin discriminacion politico. "Nos a bin pa traha riba cambio berdadero cu lo permanentemente marca nos cultura politico. Esaki ta permanece nos compromiso y esaki nos lo logra. Raiz ta desea Geoffrey tur clase di exito cu su siguiente proyectonan y ta gradici'e pa e tempo y energia cu e la dedica na nos causa y pa Aruba. E forza di Raiz ta su team, cu no ta depende riba un of algun individuo, pero ta un colectivo di miembronan cu e meta comun pa trece cambio structural den politica na Aruba," a señala.

Bon Dia Aruba a tuma contacto cu minister Wever pa asina por trece dilanti un poco mas di informacion tocante su retiro, mirando cu e comunicado ta di e partido mes, pero te na ciere di edicion aki e mandatario a keda sin duna un contesta.

Despues cu algun medio di comunicacion local a circula e rumor cu actual minister demisionario di Asunto Economico, Comunicacion y Desaroyo Sostenible, Geoffrey Wever lo tabata bandonando e partido pa uni cu Gerlien Croes den e partido nobo Futuro, partido Raiz mes a bin dilanti cu un "fact check" pa desmenti esaki dia 16 di september.

Ta parce cu e rumornan a cuminsa pa motibo di un potret cu Gerlien Croes, kende 15 di september ultimo a lansa su partido nobo, Futuro, a post riba rednan social despues di apertura di Aña Parlamentario. Riba e potret por a mira Croes cu Wever, acompaña pa un frase celebrando nan amistad y relacion como colega den ambito politico di Aruba. Esaki a pone cu algun medio di comunicacion local a circula e rumor cu Wever lo bandona Raiz pa uni Futuro, lo cual awe por confirma cu tabata berdad.

Abogado Lincoln Gomez:

Detencion inusual di minister Glenbert Croes ta genera preocupacion

Den un desaroyo significativo ayera, 8 di october, minister di Labor, Energia y Integracion, Glenbert Croes a keda aresta como parti di e investigacion andando den caso Portulaca. Segun un comunicado di prensa di Ministerio Publico (OM), tambe a tene un inval na cas di Croes despues di su aresto.

Investigacion Portulaca ta un investigacion a largo plaso lidera pa fiscalia enfoca riba sospecho di ofensanan criminal relaciona cu emision di permiso di residencia y trabao entre aña 2020 y presente.

Portulaca a genera titular den pasado. Anteriormente e aña aki a haci varios aresto dia 4 di juni y a ehecuta inval na varios cas y negoshi. E sospecha contra minister Croes a bin dilanti despues di analisa obhetonan confisca durante e invalnan anterior aki.

Un aspecto notable di detencion di Croes ta cu a hib'e base di marina Hulandes na Savaneta (Marinierskazerne) na lugar di un warda di polis of oficina di Landsrecherche, cual ta e sitio mas convencional pa interrogacion. E escogencia di sitio, recordando e caso involucrando oficial Venezolano Hugo "El Pollo" Carvajal, a genera speculation. Sinembargo, autoridadnan no a duna mas detaye tocante pakico a hiba Croes na e sitio specifico aki. E escogencia pa usa e sitio probablemente ta pa motibo di of den cooperacion cu gobierno Hulandes.

Kico ta Portulaca?

Interesantemente, e number di e investigacion, Portulaca ta comparti su number cu un yerba tambe conoci como purslane. Purslane ta un mata fuerte, cu ta tolera segura. Pero ademas di su uso ornamental, Portulaca tambe ta un mata comestible. E conexion entre e mata y e investigacion no ta cla. Escogencia di e number aki por ta un

metafora pa algo resiliente, comun o talbes hasta plamando di manera keto, hopi manera e acusacionnan riba cual e investigacion ta centra.

Ramificacion legal y status di e minister

Segun Artículo 17b di Landsverordening Integriteit Ministers (AB 2021 no. 20-13), si un minister keda acusa como sospechoso oficialmente den un investigacion criminal, e mester retira inmediatamente. E articulo ta bisa explicitamente: "De minister dient met onmiddellijke ingang zijn ontslag in, indien de minister:

b. als verdachte wordt aangemerkt in een lopend strafrechtelijk onderzoek ter zake van een misdrijf."

(Traduccion: "E minister mester entrega nan retiro inmediatamente si nan keda designa como un sospechoso den un investigacion criminal andando riba un crimen.")

Te awo, Croes ta bao investigacion y no a duna ningun declaracion.

Fiscalia ta limita informacion y timing di e aresto

Fiscalia a restringi estrictamente contacto cu minister Croes, permitiendole pa papia solamente cu su abogadonan. Den nan comunicado di prensa, nan a clarifica cu e timing di e aresto tabata basa riba hallazgonan di e investigacion y no influencia pa eventonan politico recien, incluyendo e collapse di e gabinete dia 9 di september y anuncio di



eleccion nobo.

Nan a enfatisa cu e aresto a sucede ora e sospecha contra Croes a bira concreto y fit den e plan existente di Departamento Nacional di Investigacion Criminal, e onderzoeksrechter, y Fiscalia. Autoridadnan tambe a indica cu por bin mas aresto mientras e investigacion ta continua.

Investigacion Portulaca ta parce leu di caba, y e aresto di un figura politico asina prominente ta señala un escalacion severo den e caso. Publico y establecimiento politico ta bay observa di cerca mientras mas informacion ta bira disponible.

Keda pendiente pa update di e storia den desaroyo aki.

Nota di redaccion: E articulo aki ta un traduccion di un opinion di abogado Lincoln Gomez.

Periodista Marko Espinoza aresta

Despues cu prensa tabata den un estado di tension henter dia pa motibo di aresto di minister demisionario Glenbert Croes, anochi a cera cu otro aresto: esun di periodista Marko Espinoza.

Video riba rednan social a circula mustrandando Espinoza na boei.

Informacion cu Bon Dia Aruba a ricibi ta indica cu motibo di e aresto tabata cu no a cumpli cu orden di autoridadnan pa stop di graba na Landsrecherche. Espinoza lo a bisa cu kier a saca potret di minister Croes cu boei na su man. Argumento di Espinoza tabata cu ta un sitio publico. Asina mes, el a keda deteni.

Sinembargo, el a recupera su libertad despues di algun ora.